

PENDAHULUAN

PENDAHULUAN

Perbuatan Jahat : Satu Kajian Perbandingan Di Antara Undang-undang Jenayah Islam Dengan Undang-undang Jenayah Malaysia. Ianya merupakan tajuk perbincangan bagi penulisan ilmiah ini.

Kajian ini adalah merujuk kepada unsur luaran atau unsur perbuatan yang menjadi salah satu unsur penting di dalam perbincangan tentang tajuk undang-undang. Di samping unsur perbuatan unsur mental juga perlu bagi mensabitkan seseorang dengan sesuatu jenayah yang ia lakukan. Sekiranya tidak kedapatan kedua-dua unsur ini bagi pihak yang didakwa maka sabitan tidak boleh dikenakan terhadap orang tersebut. Kesimpulannya kedua-dua unsur ini saling memerlukan antara satu sama lain dalam menjayakan tiap pendakwaan yang dibuat.

Di samping itu penulisan ini juga ingin memaparkan kepada pembaca tentang hakikat wujudnya persamaan dan perbezaan antara undang-undang jenayah Islam dan juga undang-undang jenayah Malaysia. Dan kesimpulan yang dapat dibuat undang-undang Islam merupakan satu khazanah yang bernilai yang perlu diketengahkan.

TUJUAN KAJIAN.

Latihan Ilmiah ini ditulis adalah sebagai memenuhi syarat untuk mendapatkan Ijazah Sarjana Muda Syariah dengan Kepujian. Kajian ini bertujuan untuk melihat titik persamaan dan perbezaan di antara undang-undang jenayah Islam dan juga undang-undang jenayah Malaysia.

Di samping itu penulisan ini juga ingin membongkar kembali penulisan-penulisan yang berhubung dengan undang-undang jenayah Islam yang selama ini terbiar dan tidak mendapat perhatian dari masyarakat Islam dan bukan Islam seluruhnya.

Penulisan ini juga bertujuan untuk menghapuskan prejudis atau buruk sangka terhadap undang-undang jenayah Islam yang dikatakan bersifat kolot dan lebih menyedihkan lagi dikatakan sebagai undang-undang yang kejam yang tidak sesuai dilaksanakan pada zaman ini.

LATAR BELAKANG KAJIAN.

Di dalam memenuhi era yang dikatakan sebagai era kebangkitan Islam masa kini, dirasakan perlu bagi penulis memberikan sedikit sumbangan ke arah memenuhi kebangkitan

ini. Di samping itu penulisan yang sebegini juga amat kurang jika kita perhatikan di dalam negara kita ini, sedangkan ia merupakan satu tuntutan bagi umat Islam untuk melaksanakannya.

Walaupun wujud penulisan berhubung dengan konsep perbandingan kedua-dua undang-undang jenayah ini, tetapi ia lebih difokaskan kepada penulisan tentang jenayah hudud dan juga qisas. Sedangkan penulisan yang sebegini sudah lama disentuh oleh para fuqaha Islam yang terdahulu. Tetapi bagi penulisan yang berbentuk konsep-konsep tertentu bagi undang-undang jenayah misalnya konsep cubaan, konsep perlakuan jahat berbentuk kumpulan ianya amat sedikit ditulis. Sedangkan kita melihat di dalam perundangan jenayah yang wujud di dunia ini konsep-konsep sebegini telah lama diperkatakan.

Kajian yang dibuat oleh penulis ini keseluruhannya adalah berdasarkan kajian buku-buku teks undang-undang jenayah bagi kedua-dua undang-undang. Kebanyakan bahan-bahan yang diperolehi adalah diambil dari perpustakaan undang-undang Universiti Malaya, Perpustakaan Pusat Islam dan juga Perpustakaan Universiti Kebangsaan Malaysia.

BIDANG KAJIAN.

Kajian ini adalah difokaskan kepada kepentingan unsur perbuatan di dalam sesuatu perlakuan jenayah. Di samping itu pengkajian ini juga untk mencari seberapa banyak titik persamaan dan perbezaan di antara kedua-dua undang-undang ini.

METHODOLOGI KAJIAN.

Di dalam kajian ini, penulis menggunakan Method Penyelidikan Perpustakaan (Library Research) yang dilakukan di Perpustakaan Umum Universiti Malaya, Perpustakaan Undang-undang Universiti Malaya, Perpustakaan Pusat Islam dan juga Perpustakaan Universiti Kebangsaan Kebangsaan.

Setelah mengumpul data-data yang diperolehi, penulis menggunakan Method Komparatif untuk mencari perbezaan dan persamaan yang wujud di antara kedua-dua undang-undang tadi.

MASALAH KAJIAN.

Semasa penulis melakukan kajian ini terdapat berbagai masalah yang dihadapi oleh penulis. Masalah

utama ialah dalam usaha memahami data-data yang pada keseluruhannya berbahasa Arab dan juga bahasa Inggeris. Amat kurang sekali bahan yang boleh diperolehi di dalam bahasa Malaysia.

Masalah juga timbul semasa penulis melakukan rujukan di Perpustakaan Universiti Kebangsaan, kerana penulis terpaksa menghabiskan banyak masa dan belanja untuk melakukan rujukan di sana kerana ianya terletak agak jauh dari tempat tinggal penulis.

Walaupun begitu hasil tunjuk ajar dan bimbingan dari penyelia penulis, kajian ini akhirnya dapat juga diselesaikan.